

**PRU-13: Waktunya sudah tiba, kata Najib**  
**The Malaysian Insider**  
**01 Disember, 2011**

KUALA LUMPUR, 1 Dis — Perdana Menteri Datuk Seri Najib Razak hari ini sekali lagi memberi bayangan bahawa pilihan raya umum ke-13 akan diadakan tidak lama lagi — spekulasi menyebut ia akan diadakan awal 2012.

Najib, yang juga Presiden Umno dalam ucapan perasmian Perhimpunan Agung Umno 2011 di sini, mengingatkan semua anggota parti supaya “merapatkan saf, menyalakan jamung dan menggigit sekuatnya perjuangan dengan geraham kita” bagi menghadapi pilihan raya umum akan datang.

“Palulah genderang perang, palulah ia tabuh-tabuhan dan tiupkanlah semboyan. Masanya sudah hampir, waktunya sudah tiba.

“Bingkaslah orang-orang Umno, kita turun ke medan bakti,” katanya sambil melaungkan Hidup Umno yang disambut gemuruh 2,711 perwakilan di Dewan Merdeka, Pusat Dagangan Dunia Putra.

Najib dalam amanatnya kepada perwakilan pada Selasa lepas mahu pimpinan parti di peringkat bahagian dan akar umbi bekerja secara luar biasa bagi menghadapi pilihan raya umum ke-13.

Mandat semasa hanya akan berakhir April 2013.

Najib juga menggesa supaya para wakil bahagian parti jangan mengambil mudah pilihan raya umum ke-13 kerana cabarannya pasti luar biasa dan yang paling getir bakal dihadapi oleh parti politik terbesar negara itu.

The Malaysian Insider  
Hakcipta © 2011 The Malaysian Insider  
Source: <http://www.themalaysianinsider.com/bahasa/article/pru-13-waktunya-sudah-tiba-kata-najib/>